



# mjesečni Bilten

omladinska mreža bosne i hercegovine

april  
travanj  
2019.

239

## Dragi prijatelji/ce,

Predstavljamo vam **aprilsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u aprilu 2019.....	2
Planovi za maj 2019. ....	4
Aktivnosti članova mreže.....	5
Saopštenja/informacije/donatori/pozivi .....	20

Uživajte u čitanju!

## AKTIVNOSTI ORC/HCA U APRILU 2019.

### Divided Past – Joint future: Rezultati selekcije za trening iz društvenih inovacija na polju izgradnje mira i pomirenja.



Poziv za učešće na treningu iz društvenih inovacija na polju izgradnje mira i pomirenja je objavljen 7. aprila, za koji je bilo potrebno dostaviti prijavu u obliku koncepta projektnog prijedloga.

Cilj treninga iz društvenih inovacija je kreirati inovativne projekte na temu pomirenja, koji su bazirani na međusektorski pristup rješavanju društvenih izazova.

Poziv za prijavu na trening je zatvoren 21. aprila, nakon čega su izabrane četiri organizacije sa zadovoljavajućim konceptima projektnog prijedloga. Organizacije koje su prošle proces selekcije su **IPAK – Mladost gradi budućnost, Eko Leonardo, Ženska Vizija i Udruženje logoraša Novi Grad Sarajevo.**

Sljedeći koraci u implementaciji treninga iz društvenih inovacija na polju izgradnje mira i pomirenja su identifikacija i mapiranje relevantnih stakeholdera za organizacije koje su uspješno prošle proces selekcije, kao i kreiranje modela ciljne grupe za svaku organizaciju kroz metodu empatijske mape.

Trening iz društvenih inovacija na polju izgradnje mira i pomirenja je aktivnost u sklopu projekta Divided Past – Joint Future, čiji je projektni lider organizacija OKC Banja Luka. Projekat je podržan od strane Evropske Komisije kroz program IPA fondova.

### Fokus grupa „Protiv radikalizacije i nasilnog ekstremizma u bh. javnom prostoru“



Omladinskog resursnog centra Tuzla.

9 aprila je u hotelu Central Sarajevo održana fokus grupa na temu “Protiv radikalizacije i nasilnog ekstremizma u bh. javnom prostoru” u organizaciji Fondacije "Mediacentar".

U fokus grupama učesnici su diskutovali o određenom problemu uz stručno moderiranje razgovora, a također učesnici su kroz video zapise intervjuja i članaka sa portala donosili svoja mišljenja i zaključke.

Fokus grupa je bila nastavak trening radionica o medijskog pismenosti i informisanosti koje su bile organizovane u mjesecu januaru ove godine.

Na fokus grupi je učestvovao Benjamin Burek ispred

## Festival savremene žene 2019.



Nakon Prvog međunarodnog Festivala savremene žene koji je pokupio sve simpatije i oduševio goste i gošće, 11.aprila je svečanom ceremonijom u dvorani Bosanskog kulturnog centra u Tuzli otvoren Drugi međunarodni Festival savremene žene u organizaciji Radio Kameleona i Ženski.ba.

Više od **100 žena** iz BiH, susjednih država i svijeta okupilo se u **Tuzli** kako bi u četiri dana koliko traje festival razmjenjivale mišljenja, govorile o svojim iskustvima i promovirale ravnopravnost, kroz predavanja, panel diskusije i motivacione govore. Ispred ORC-a Tuzla kao volontera učešće je uzela Mirela Biković.

## Omladinska grupa ORC Tuzla

### Jačanje kapaciteta omladinskih aktivista i izgradnja tima – Javorje 2019.



Na Javorju je od 26. do 28. aprila održana aktivnost jačanja kapaciteta omladinskih aktivista i izgradnje tima. Aktivnost je održana u sklopu follow up faze projekta Youth Work in Progress, na kojem je Omladinski resursni centar jedan od partnera.

Aktivnost je obuhvatala izgradnju tima kroz uspon na planinu Konjuh do planinarskog doma Javorje i jačanje kapaciteta omladinskih aktivista kroz informativne i trening sesije na temu liderstva, projektnog menadžmenta, online učenja, mentorstva u omladinskom radu, kao i digitalnih alata u implementaciji aktivnosti omladinskih organizacija i generalno u omladinskom radu.

Na aktivnosti jačanja kapaciteta omladinskih aktivista i izgradnje tima je učestvovalo 12 članova Omladinske grupe Omladinskog resursnog centra.

Aktivnost je podržala organizacija SEEYN iz Sarajeva, nosilac projekta Youth Work in Progress, finansiran od strane Evropske Komisije kroz program Erasmus



## REDOVNE AKTIVNOSTI ORC i hCa TUZLA

Tokom aprila radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

## PLANOWI HCA/ORC-A ZA MAJ 2019.

- Početak implementacije nove kampanje - „CAT 19“. U okviru ovog projekta u naredom periodu naše aktivnosti su nastavak sa partnerima, pripreme tehničkog dijela kampanje, te planiranje kampanje.
- Aktivnosti omladinske grupe ORC-a Tuzla
- Pripreme za početak aktivnosti ALF BH mreže (2019. – 2020)
- Nastavak apliciranja za projekte i učešće u partnerskim projektima u regiji
- Nastavak aktivnosti u okviru partnerskog projekta koji vodi PRONI Brčko – “Mladi u borbi protiv nasilnog ekstremizma”, a u okviru programa MATRA Nizozemske ambasade u Sarajevu. Više o ovome u narednim biltenima.
- Održavanje treninga iz društvenih inovacija na polju izgradnje mira i pomirenja, u okviru projekta „Divided past – Joint future.

## AKTIVNOSTI ČLANICA OMLADINSKE MREŽE BiH



**Udruženje građana "C.E.Z.A.R." Srbac**

Zdravka Čelara 29, 78420 Srbac

Tel: 051 928 126

e-mail: [zdravosrbac@yahoo.com](mailto:zdravosrbac@yahoo.com)

### Uspjeh na međunarodnom plesnom takmičenju u Tuzli

Udruženje građana "C.E.Z.A.R." iz Srpcu učestvovalo je 30. marta po prvi put na velikom međunarodnom plesnom takmičenju "Tuzla dance festival 2019", koji je organizovao plesni klub Sandoval iz Tuzle. U izuzetno jakoj konkurenciji, oko 60 srbačkih plesača je osvojilo čak šest priznanja, i to tri zlatne i tri srebrne medalje, a uslijedila je i specijalna nagrada takmičenja u vidu besplatne kotizacije na plesnom takmičenju u Bijeljini za plesnu grupu "Vojnici". Zlatne medalje su osvojile polaznice plesa sa koreografijama "Trbušne plesačice" i "Swish swish", te polaznice ritmičke gimnastike sa koreografijom "I just wanna live", dok su srebrne medalje osvojile polaznice ritmičke gimnastike sa koreografijama "Male balerine", "Vojnici" i "Wrecking".



"Kao i uvijek, nije nedostajalo smijeha i dobrog raspoloženja i uspjeh ne mjerimo samo brojnim medaljama, nego i činjenicom da su naša djeca uživala i da smo im pružili šansu za socijalizacijom. Veliku zahvalnost dugujemo roditeljima koji su snosili sve troškove takmičenja i kao i uvijek do sada, bili najbolji navijači", rekla je izvršni direktor udruženja, Tanja Šnjegota. Za plesače Cezara nema odmora, budući da slijede intenzivne pripreme za plesno takmičenje u Vitezu, kao i pripreme za nekoliko nastupa na manifestacijama u Srpcu, a u toku su i pripreme za veliki ljetni koncert udruženja.

### Istraživanje o mentalnom zdravlju mladih

Udruženje "C.E.Z.A.R." zajedno sa gimnazijalcima ugostio je predstavnike organizacije Orygen - "The National Centre of Excellence in Youth Mental Health" iz Australije, koji sprovode istraživanje o mentalnom zdravlju mladih, a rezultate istraživanja predstavice sljedeće godine na Svjetskom ekonomskom forumu u Ženevi.



## Obilježen svjetski dan zdravlja



Svjetski dan zdravlja koji se obilježava svake godine u mjesecu aprilu gotovo sedam decenija, pod pokroviteljstvom Svjetske zdravstvene organizacije, obilježen je i u Srpcu. Obilježavanju Svjetskog dana zdravlja priključilo se i Udruženje građana „C.E.Z.A.R.“ koje je organizovalo uličnu akciju uz pomoć volontera Lokalnog volonterskog servisa. Oni su građanima na trgu dijelili voće uz razne edukativne poruke kojima su promovisali zdrav način života. Volonteri su podijelili nekoliko kilograma voća, razgovarali sa građanima i skrenuli im pažnju da vode zdrav život.

## Projekat neformalne edukacije u školama:

Ministarstvo porodice, omladine i sporta je, zajedno sa edukatorima, osposobljenim od strane Volonterskog servisa Republike Srpske, počelo da sprovodi edukativne radionice u srednjim školama. Ova edukacija će, na prilagođen način, upoznati predstavnike savjeta učenika sa mogućnostima da se aktivno uključe u društvo, te ih informisati da putem volontiranja imaju priliku da steknu nova znanja i vještine i kvalitetno provedu slobodno vrijeme, doprinoseći istovremeno razvoju svojih lokalnih zajednica.



Projekat „Edukativne radionice u srednjim školama Republike Srpske“ predstavlja model neformalne obuke koja je održana u Školskom centru „Petar Kočić“ u Srpcu, a plan je da se održi i u ostalim srednjim školama u Republici Srpskoj.

Prvoj radionici je prisustvovalo 30 učenika, predstavnika savjeta učenika, a edukaciju su održali predstavnik Ministarstva Saša Ugren, Viši stručni saradnik za saradnju sa omladinskim organizacijama i koordinaciju rada Trening centra Republike Srpske, Svjetlana Popović, izvršna direktorica Volonterskog servisa Republike Srpske i obučeni edukatori za radionice: izvršni direktor Udruženja „C.E.Z.A.R.“ iz Srpca Tanja Šnjegota i koordinator Lokalnog volonterskog servisa Suzana Šarić.

Osmišljeno je da učenici srednjih škola uključeni u projekat učestvuju u seriji od dvije dvočasovne radionice. Prva radionica za cilj imala upoznavanje učenika sa osnovnim pojmom i značajem volontiranja, te sa vrstama i benefitima volontiranja. Nakon što su se upoznali sa osnovama volontiranja, fokus je bio na motivaciji kao ključnom razlogu za volontiranje. Učenici su bili veoma

zainteresovani i u planu je da se naredna radionica održi početkom maja, a na njoj bi učenici trebalo da nauče kako da kreiraju i realizuju volontersku akciju.

## Kreativni petak



Svakog petka u Udruženju održavaju se besplatne kreativne radionice za srbačke mališane i srednjoškolce. Radionicama stalno prisustvuje veliki broj polaznika, a kreativni radovi nastali na radionicama prodaju se na brojnim izložbama u gradu.

## Biciklistička trka „Beograd – Banja Luka“

Volonteri Lokalnog volonterskog servisa učestvovali su u realizaciji prolaska biciklističke trke “Beograd – Banja Luka” kroz Srbac, dok su polaznici plesa učestvovali u kulturno – umjetničkoj manifestaciji.



## „Dan planete Zemlje“

Udruženje građana „C.E.Z.A.R.“ iz Srpcu organizovalo je 22. aprila radnu akciju u Omladinskom parku na Bolničkom brdu u Srpcu, čime je obilježen Dan planete zemlje, kao međunarodni dan koji se od 1992. godine obilježava u više od 150 zemalja svijeta, sa ciljem da ljude podsjeti u kakvom je stanju priroda naše planete i ujedno ukaže na probleme ekosistema. Volonteri Cezara su zajedno sa polaznicima kreativnih radionica “Mali kreativci” ofarbali nadstrešnicu, klupice, posadili cvijeće i drveće i pokupili smeće i travu, čime su dodatno uljepšali park.



Mališani su takođe naučili da je očuvanje naše planete jako bitno, budući da drugu nemamo, i zajedno sa ostalom radnom ekipom poslali su veoma važnu poruku da je potrebno samo malo truda i rada, ali i entuzijazma, ako želimo da postignemo zapažene rezultate i ostvarimo velike stvari, a jedna od njih je svakako i sama ideja Omladinskog parka. Druženje je završeno igrom i zadovoljstvom sa svih strana, uz obećanje da će se ovakve akcije i dalje obavljati i da park neće biti zaboravljen.



„C.E.Z.A.R.“ je početkom oktobra prošle godine svečano otvorio Omladinski park koji raspolaže velikim brojem igrački i sprava za rekreaciju djece i mladih, poput klackalica, ljuljaški, stola za stoni tenis, teretanu na otvorenom i druge zabavne sadržaje. Projekat izgradnje parka pod radnim nazivom „Aktivno ljeto“ realizovan je u sklopu programa Omladinske banke Srbac kao jedan od 10 projekata mladih u prošloj godini koga su finansirali Fondacija „Mozaik“ i Opština Srbac koja je obezbijedila parcelu površine 455 kvadrata za izgradnju parka. Pomoć u adaptaciji novog prostora za mlade pružila je i Fondacija „SHL“, kao i veliki broj donatora i mještana. Za angažman u omladinskom razvoju, a naročito u izgradnji Omladinskog parka udruženje „C.E.Z.A.R.“ je u oktobru prošle godine na svečanoj akademiji povodom Dana i krsne slave opštine Srbac dobilo Zahvalnicu opštine.

## Manifestacija „U susret Vaskrsu“

Na Srbačkom trgu organizovana je tradicionalna manifestacija „U susret Vaskrsu“, koja je okupila oko 150 mališana koji su farbali uskršnja jaja. Preljep prolječni dan izmamio je na ulice Srpcu ne samo brojne mališane, već i prolaznike koji su sa velikim interesovanjem ispratili ovu manifestaciju i isprobali neke od specijaliteta domaće kuhinje. U sklopu manifestacije održan je i vaskršnji mini sajam narodnih rukotvorina, suvenira i ukrasnih predmeta u kojem su između ostalih, učestvovali i predstavnici Udruženja građana „C.E.Z.A.R.“ Osim toga, volonteri Cezara su pomogli u realizaciji ove manifestacije.





## PRONI Centar za omladinski razvoj

Ul. Hadži Vasvije Zejčirović 5, 76100 Brčko distrikt BiH  
Tel./Fax: +387 49 217 695  
E-mail: [info@proni.ba](mailto:info@proni.ba)  
[www.proni.ba](http://www.proni.ba)

## PRONI u svakom gradu



U ovoj godini radimo i kreiramo bolji svijet za mlade u 19 opština i gradova BiH kroz programe: PRONI Omladinskih klubova, PRONI Akademije omladinskog rada, PRONI Ambasadora mira, Kontakt tačke za Erasmus+ mladi, Programe prevencije nasilnog ekstremizma i kroz mnoge druge projekte koje realizujemo gdje uključujemo mlade iz čitave BiH. Očekujemo jos par gradova i opština da se priključe ideji "PRONI u svakom gradu". Za saradnju kontaktirajte nas putem [proni.ba](http://proni.ba)

## Prijave za „Iniciraj dijalog: Aktivni mladi za transparentne parlamente“

Perpetuum Mobile u suradnji sa PRONI Centrom, kao lokalnim partnerom za gradove Mostar i Bijeljina, implementira projekat „Iniciraj dijalog: Aktivni mladi za transparentne parlamente“, koji će omogućiti mladim ljudima od 15 do 19 godina da usavrše vještine u polju komunikacije, lobiranja, i aktivizma, kao i posjetu entitetskom i državnom parlamentu.

Prilikom posjete parlamentima, učesnici će imati priliku razgovarati sa parlamentarcima o problemima koji su bitni za mlade.

Sve troškove učešća na radionicama i posjetama parlamentima snosi organizator.

Institut „Perpetuum mobile“ realizuje projekat „Iniciraj dijalog: Aktivni mladi za transparentne parlamente“ u sklopu projekta „Dijalog za budućnost“, koji implementiraju UNDP, UNICEF i UNESCO u partnerstvu sa Predsjedništvom Bosne i Hercegovine. Projekat „Dijalog za budućnost“ se finansira sredstvima Ureda Ujedinjenih nacija za podršku izgradnji mira / Fonda za izgradnju mira (PBF). "



## Dijalog o pomirenju

Predstavnici PRONI Centra sa kolegama i mladim ljudima iz cijele BiH su, 16. Aprila, učestvovali u dijalogu o pomirenju sa predsjednikom Republike Slovenije, Njegovom Ekselencijom gospodinom Borutom Pahorom.

## Prvi radni sastanak sa polaznicima PAOR Akademije



17. aprila je u prostorijama omladinskog kluba Sarajevo održan prvi radni sastanak sa polaznicima PAOR akademije. Na sastanku su prisustvovali: Generalni menadžer gdn. Jasmin Jašarević, omladinski radnik OK Sarajevo gdn. Vedad Lemeš, gdn. Harun Šabanović menadžer omladinskih klubova i polaznici akademije.

## Osnove omladinskog rada

Treneri PRONI Centra su 19. Aprila održali info sesiju na početku šestomjesečnog obrazovnog programa "Osnove Omladinskog Rada" u Kalesiji i Zvorniku, koji će obučiti 12 polaznika osnovama omladinskog rada, koji će raditi u dva novootvorena Omladinska kluba u ovim mjestima. Program podržava IOM u BiH a sprovodi ga Udruženje građana "Spektar" Kalesija sa partnerima u Kalesiji i Zvorniku.

## Sastanak sa gradonačelnikom Živinica

22.aprila smo sa gradonačelnikom Živinica i njegovim bližim saradnicima iz ovog grada razgovarali o mogućnostima otvaranja i rada PRONI Omladinskog kluba. Više informacija uskoro.

Sastanak je upriličio Emin Malkić, omladinski aktivista iz Živinica.



## Projekcija dokumentarnog filma „ReGeneracija“

PRONI kao partner na projektu reGeneracija sudjelovao je 23. Aprila na projekciji dokumentarnog filma "ReGeneracija" na The George Washington University.

Film koji govori o pomirenju u BiH dobio je veliku podršku od studenata i profesora ovog univerziteta kao i od BiH dijaspore u SAD.

Projekat koji sprovodi International Republican Institute (IRI) (BiH) u saradnji sa Magacin Kabare podržan je od USAID Bosnia and Herzegovina i nominovan je za najbolji dokumentarni film na SEE Fest u Los Anđelesu.



## yoUThILIZE e-participation trening

PRONI Centar je, zajedno sa 25 učesnika iz 8 evropskih zemalja učestvovao na yoUThILIZE e-participation treningu kojeg je organizovao Libero. Trening je održan u Vršcu od 8. do 14. aprila 2019. godine.

Tokom treninga učesnici iz cijele Evrope su imali priliku da nauče kako da analiziraju postojeće i kreiraju inovativne metode i pristupe za e-participaciju i e-demokratiju, te kako bi mladi ljudi imali pristup donošenju odluka.

Cilj treninga je da kroz zabavne radionice kreiramo pristup e-demokratiji i e-participaciji prilagođeno mlađoj populaciji, kako bi mogli u narednom period donositi odluke na lokalnom nivou svoje zajednice.

## Konferencija za krovna tijela za mlade

U okviru projekta "Together we are strong" PRONI Centar za omladinski razvoj je 23. Aprila realizovao konferenciju u hotelu Jelena u Brčkom, koja je okupila krovna tijela za mlade Vijeće mladih Federacije BiH, Vijeće/Savjet mladih Brčko distrikta BiH, te institucije za pitanja mladih Ministarstvo civilnih poslova, Federalno ministarstvo kulture i sporta.

Konferenciji su takođe prisustvovali predstavnici OSCE Mission to Bosnia and Herzegovina i IOM Bosnia and Herzegovina. Konferencija je imala za cilj unapređenje međusektorske saradnje između NVO sektora i institucija koje se bave pitanjima mladih, takođe promociju SDG ciljeva UN-a i Preporuka Vijeća Evrope kada je u pitanju omladinski rad.

Projekat je podržan od CSO Partnership for Development Effectiveness.

## Sastanak sa omladinskim organizacijama

Dva dana (23.-24.04.) smo učestvovali na sastanku nekoliko omladinskih organizacija i organizacija za mlade iz cijele BiH, gdje smo razgovarali o trenutnoj poziciji omladinskog sektora i perspektivama saradnje za budućnost.

Hvala Institutu za razvoj mladih KULT Sarajevo na pozivu i izuzetno dobro pripremljenom sastanku.

## „Facilitacija dijaloga“

U periodu od 23 do 25 aprila 2019 godine, održan je seminar „Facilitacija dijaloga“, koji je organizovao Centar za izgradnju mira Sanski Most - CIM, u sklopu projekta "Societal Transformation and Reconciliation (STaR) / Društvena transformacija i pomirenje".

Seminar je imao za cilj da osnaži i unaprijedi vještine 20 facilitatora u facilitaciji dijaloga, koji dolaze iz projektnih partnerskih organizacija STaR projekta koji će stečeno znanje koristiti u aktivnostima koje se implementiraju kroz ovaj projekat a samim time i u svakodnevnom radu u promociji izgradnje mira.

Predavači sa dugogodišnjim iskustvom u facilitaciji dijaloga na seminaru su bili dr. Paula Green, "Karuna Center for Peacebuilding" USA i osnivač Centra za izgradnju mira Vahidin Omanović.

U narednom periodu, učesnici ovog seminara realizovat će lokalne aktivnosti s ciljem primjene stečenog znanja, a do kraja godine za učesnike će biti organizovan i napredni trening.

Inače, projekat pod nazivom STaR (Societal Transformation and Reconciliation/ Društvena transformacija i pomirenje), koji je podržan od strane USAID Bosnia and Herzegovina, zajednički implementiraju Karuna Center for Peacebuilding, Mali koraci - Small Steps, Inicijativa mladih za ljudska prava u BiH - YIHR BiH i PRONI Centar.





## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH  
Tel./Fax: +387 49 211 032  
E-mail: [svitac@gmail.net](mailto:svitac@gmail.net)  
Web: [www.svitac.org](http://www.svitac.org)  
FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice

Omladinska organizacija Svitac je nastavila sa svakodnevnim aktivnostima po redovnom rasporedu, prva grupa učesnika od 11:00-13:00 uzrasta od 4-7 godina, a druga grupa učesnika od 14:00-15:30 uzrasta 8+. Mlađi učesnici su kreirali edukativne stvari uz pomoć lokalnih i međunarodnih volontera. Grupa najmlađih učesnika je imala priliku slušati priče: Mač u kamenu, Petar Pan, Cvrčak i mrav. Uz ovu metodu aktivnog slušanja su zajedno u grupi vježbali održavanje koncentracije i pamćenje, jer su nakon svake pročitane priče imali kraću diskusiju, prilagođenu njihovom uzrastu. Takođe su učili o dinosaurima, te su pravili model od papira Pteranodona, kojem se mogu pomijerati krila. I ovaj mjesec su vježbali i ponavljali vokabular dijelova tijela na engleskom jeziku. Na muzičkim radionicama su vježbali pjesme „Kad si sretan,“ i „Do-Re-Mi“, te su imali priliku svirati zajedno na raznim udaraljka i akustičnim instrumentima. Na kreativnom izražavanju su pravili svemirske brodove. Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, stickeri, radni listovi plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili razne kreacije koristeći razne materijale: čestitke za 20-ti rođendan Svitca, sa posebnom tehnikom lijepljenja papira su pravili vaze i cvijeće; naučne radionice – programiranje jednostavne video igre u besplatnom programu „Game maker studio“. Utorkom su učesnici vježbali engleski jezik i svakodnevnu komunikaciju; i ovaj su mjesec rađene igre prijateljstva, koje poboljšavaju učenje stranih jezika u grupi i timski rad. Pored ovih aktivnosti, učesnici su na muzičkim radionicama pisali pop-rock pjesmu. Srijedom su se održavale diskusije na temu mentalno zdravlje i šta svi možemo učiniti da poboljšamo kvalitet provođenja slobodnog vremena. Četvrtkom su se družili uz sportske aktivnosti društvene i teambuilding igre, a petkom su nastavili raditi na radionicama njemačkog i japanskog jezika. Međunarodni volonteri, Florian Pauleck i Fabia Stroetmann su 18. aprila učestvovali kao članovi žirija na usmenom takmičenju iz njemačkog jezika za srednjoškolce, koje se održava svake godine u aprilu u JU „Gimnazija Vaso Pelagić“ u Brčko distriktu. Učesnici su imali priliku kreirati dijaloge na njemačkom jeziku sa izvornim govornicima, te na taj način utvrditi postojeće znanje, ali i naučiti nove korisne fraze. Za mlade volontere iz Njemačke je ovo takođe bilo novo iskustvo, jer su se našli u ulozi ispitivača, ali su dobili priliku ostvariti nove kontakte i steći poznanstva. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugom i usvoje lijepo ponašanje. Koordinator radionica je bio Adin Midžić uz asistenciju lokalnih, Weltwärts i EVS/ESC međunarodnih volontera. Sve aktivnosti se održavaju u Omladinskom centru Brčko distrikta.

## Radionice gitare

Učesnici ovih radionica utvrđivali su naučeno gradivo i radili na novim etidama i kompozicijama. U ovom mjesecu nastavljen je rad na zahtjevnijem materijalu kao što je „Tango en skai“ (R. Dyens), „Etida No 1“ (Heitor Villa Lobos) za nešto naprednije, kao i „Tom Dooley“ (Narodna-Amerika) i „Biljana platno beleše“

(Narodna-Makedonija) za početnike.

## Radionice sambe

Učesnici ove radionice su učili čitati osnovne notne vrijednosti i kraće ritmičke obrazce. Takođe započeo je rad na dvije nove kompozicije („Bolumko“- u H-molu sa bržim tempom i „Mitdenken“ G-dur - nešto sporijeg tempa).

## Promovisanje volonterizma

Naši međunarodni volonteri bili su pozvani u srednju školu Gimnazija na čas Njemačkog jezika, kako bi razgovarali o mogućnostima volontiranja. Učenici su naučili na kojim poljima volonteri mogu raditi i zašto je to vrijedno iskustvo, posebno nakon diplomiranja i prije njihove daljnje karijere. Mogli su im postaviti pitanja o njihovoj odluci za volontersku službu i njihov rad u Omladinskoj organizaciji Svitac.



Takođe su sudjelovali i pomagali u nastavi njemačkog jezika u pripremi kazališne predstave u Gimnaziji. Prilikom ove saradnje učenici srednjih škola su iskoristili pomoć izvornih govornika njemačkog jezika za poboljšanje vokabulara, stila, izgovora, intonacije, a time i ukupne kvalitete svoga rada.

## „Global Money Week – Globalna sedmica novca

Omladinska organizacija Svitac je 03.04. podržala aktivnost „Global Money Week – Globalna sedmica novca“ Asocijacije srednjoškolaca u Bosni i Hercegovini (ASuBiH), koja je nevladina, nestranačka, nepolitička i neprofitna organizacija koja okuplja preko 1200 srednjoškolaca u 62 lokalne zajednice širom Bosne i Hercegovine.



„Global Money Week – Globalna sedmica novca“ je projekat pokrenut na inicijativu CYFI (Child and Youth Finance Initiative) sa ciljem inspirisanja djece i mladih ljudi da se informišu o novcu, izdržavanju i poduzetništvu. Ovaj projekat je nastao 2012. godine kao Child Finance Day te je otad utjecao na živote 7.8 miliona djece i mladih ljudi kroz 23 700 organizacije u čak 137 država. Asocijacija srednjoškolaca je dio njihove kampanje još od 2015.

Kako je ove godine projekat obilježen u vidu natjecanja u fundraising-u/prikupljanju novčanih sredstava između lokalnih timova, članovi ASuBiH su održali interaktivnu radionicu prilagođenu uzrastu „Valute iz cijelog svijeta„. Najmlađi učesnici su imali priliku pogledati razne primjerke novčanica, te nakon toga kreirati vlastitu. Roditelji učesnika, koji su željeli podržati ovu akciju, imali su priliku donirati 0,50 KM. Sav novac koji je prikupljen, ide u Fond Lokalnog tima Brčko, koji će se koristiti za daljnje potrebne aktivnosti.

Aktivnost za uzrast 4-7 godina je održana od 11:00-13:00 časova u Omladinskom centru Brčko distrikt. Pored ove aktivnosti, održane su razne igre takmičarskog duha, te diskusija na temu novac, odnos prema novcu i koliko je štednja važna.

## Svjetski dan zdravlja



U skladu sa odlukom Prve svjetske zdravstvene skupštine i pod pokroviteljstvom Svjetske zdravstvene organizacije (SZO) u svijetu se, a i kod nas 07. aprila kontinuirano obilježava Svjetski dan zdravlja.

Omladinska organizacija Svitac je, uz podršku Crvenog Krsta iz Brčko distrikta, organizovala radionicu o kardiopulmonalnoj reanimaciji za uzrast 13+. Učesnici su imali priliku informisati se o važnosti pružanja

Prve pomoći i reanimaciji. Radionica je održana u prostorijama Omladinskog centra.

## Proljetni festival 2019.

Omladinska organizacija Svitac je 12.04. organizovala „Proljetni festival“ i ujedno i rođendansku zabavu, jer ove godine Svitac obilježava 20 godina rada. (<https://youtu.be/1rOGCNSSkWU>)



Zanimljiv muzički program, koji su pripremili lokalni volonteri je bio namijenjen za porodicu i prijatelje učesnika, ali takođe i za djecu i mlade ljude iz Brčkog. Program su upotpunili i drugari iz Centra za njemački jezik – Glossa i iz Udruženja izviđača Brčko distrikt BiH. Publika je imala priliku da čuje izvedbe na gitari, flauti, te vokalne izvedbe ali i da pogleda plesne tačke. Gosti su takođe imali priliku pogledati tri kratka videa o dugogodišnjem radu Omladinske organizacije Svitac ( <https://youtu.be/sTSPF0qiDGc>). Nakon programa naši gosti su imali priliku za druženje uz osvježanje i rođendansku tortu. Proljetni festival je posjetilo oko 120 gostiju.

## Promoviši pozitivno

Omladinska organizacija Svitac je, kao članica mreže 'Promoviši pozitivno', potpisala Memoranduma o razumijevanju i saradnji između članica mreže.

Mreža „Promoviši pozitivno“, u saradnji sa Misijom OSCE-a u Bosni i Hercegovini, je obilježila šest godina rada i ovim Memorandumom potvrdila unapređenje između članica, te promovisanje tolerancije i jačanje društvene kohezije u Brčko distriktu BiH.

Za maj se planira nastavak svih redovnih radionica Omladinske organizacije Svitac.



## H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož  
Tel./fax: +387 53 226 886  
E-mail: merhamet.doboj@cutuk.net  
FB: www.facebook.com/Merhamet-Doboj

Osim stalnih aktivnosti koje podrazumjevaju: Evidentiranje članarine, štampanje korisnicima molbi, žalbi, raznih dopisa, fotokopiranja, rada sa članovima, pružanja informacija, raspodjele humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Dobož je tokom aprila radio na sljedećem:

**6. aprila** izvršena je raspodjela humanitarne pomoći za članove "Merhamet-a" njih oko 300, a osnovni artikli su bili: brašno, ulje, riža, hurme. H.O "Merhamet" Dobož nastoji da se pobrine za one najugroženije.



**7. aprila** polaznici mektebske nastave džemata Trnjak iz vjeronauke su polagali osnove Kur'ana prema uzrastu. Bilo je veoma lijepo vidjeti i čuti rezultate koje su postigli zahvaljujući vrijednom prof. hadž. Adil ef. Rudanoviću. Kao i svaki put "Merhamet" je u saradnji sa našom dobožkom Tubić hadži Halidom, koja svake godine učestvuje u pomoći za članove "Merhamet-a", obradovao djecu poklonima. Djeca su radosna jer su nagrađena i novčano od I.Z. Majke polaznika su za ovu priliku pripremile i zakusku.

**17 aprila** održan je seminar "Dijalog mladih i predstavnika vjerskih zajednica". Aktivisti "Merhamet-a" Dobož su prisustvovali seminaru i aktivno učestvovali u međureligijskom dijalogu, koji je bio veoma interesantan i poučan.



**18. aprila** održan je sastanak "Lokalne akcione grupe" Doboju, čiji su predstavnici predloženi od strane gradonačelnika. Ispred "Merhamet-a" prisustvovala je Avdić Faketa. Sastanak je nastavak aktivnosti za smanjivanje faktora zdravstvenih rizika; pušenje, alkoholizam, droga i zdrava ishrana. Rezimirani su uspješni rezultati s tim da i dalje nastavljamo sa aktivnostima i projektima.



**25. aprila** održan je sastanak koalicije "Tolerantno i pozitivno iz Doboja", na kojem smo se svojim prijedlozima idejama i programima pripremali za 21.maj - Dan kulturne raznolikosti. U posjetu će doći i koalicije iz Banjaluke i Prijedora, gdje ćemo se bliže upoznati i družiti. Nadamo se da će biti uspješno uz podršku OSCE-a , lokalne uprave i svih nas.



Institut za  
razvoj mladih KULT



Ul. 4. Viteške brigade  
34 – 36 BA, 71210 Ilidža,  
Sarajevo  
Tel: +387 33 778 778.  
Fax: +387 33 778 79  
E-mail: [kult@mladi.org](mailto:kult@mladi.org), web:  
[www.mladi.org](http://www.mladi.org)

## Podrška mladima iz Cazina, Novog Travnika i Jajca u pokretanju biznisa

U okviru Poduzetničkog fonda za mlade, tokom mjeseca aprila dodijeljena su sredstva mladima za pokretanje biznisa u Cazinu, Novom Travniku i Jajcu.

Fond sredstva osigurava kroz saradnju sa jedinicama lokalne samouprave, a namijenjena su za pokretanje biznisa koji će u budućnosti biti održivi i u lokalnim zajednicama kreirati nova radna mjesta. U ove tri lokalne zajednice pokrenuto je četrnaest biznisa u oblasti proizvodnje, turizma, uslužnih djelatnosti, IT sektora.



"Moja ideja je otvaranje studija za izradu video igara i želio sam, nakon godina rada za druge svjetski poznate firme, dovesti nešto ovakvo u naš grad", istakao je Nedim iz Cazina.

U okviru Preduzetničkog fonda za mlade, jedinice lokalne samouprave i Institut za razvoj mladih KULT, uz podršku Ambasade Kraljevine Švedske u BiH, osiguravaju sredstva namijenjena razvoju preduzetništva i zapošljavanju mladih sa područja osam općina i gradova.

Ukupan iznos Preduzetničkog fonda za mlade iznosi oko 400.000 KM, a bit će podržano od 50 do 100 biznisa mladih ljudi. Biznisi su do sada podržani u Općini Stari Grad Sarajevo, Općini Jajce, Opštini Teslić, Općini Novi Travnik, Općini Centar Sarajevo, Opštini Modriča, Gradu Cazinu i Gradu Trebinje.

Potpisivanje ugovora sa mladima bit će nastavljeno i u maju.

## Izetbegović i Džaferović na kafi sa mladima

„Mladi su odavno trebali biti pitanje državnog vrha, jer šteta koju trpimo zbog odlaska mladih je nenadoknadiva. Moramo kreirati uslove u Bosni i Hercegovini koji će ih zadržati ovdje.“ – poručio je Bakir Izetbegović, predsjednik Stranke demokratske akcije tokom razgovora sa mladima iz cijele Bosne i Hercegovine.

Institut za razvoj mladih KULT u aprilu je organizovao susret mladih sa članom Predsjedništva BiH Šefikom Džaferovićem i predsjednikom SDA Bakirom Izetbegovićem kako bi se pokrenuo dijalog o pitanjima mladih na prostoru cijele BiH.

Mladi su se tokom susreta interesovali za pitanja ulaska BiH u NATO, načine prevazilaženja trenutnih kriza u zemlji, ali su razgovarali i o značaju učešća mladih u političkim procesima i načinima unaprjeđenja društva u cijelosti.

Mladi su opredijeljeni za vođenje politike na način da ona vodi prosperitetu, ekonomiji, a da se u pozadinu stavljaju pitanja koja dovode do sukoba. Mladi se opredjeljuju za politiku jer se politika njih samih tiče. Smatraju da su dosta vladali stariji ljudi, jednostavno žele svoju šansu, žele unijeti svježinu u politiku i neke nove vrijednosti" – istakao je Jasmin Bešić, direktor Instituta za razvoj mladih KULT.

Institut za razvoj mladih KULT već je poznat po organiziranju događaja „Kafa sa...“, a kroz koji osigurava smislene susrete javnih osoba, političara/ki, mladih ljudi i drugih inspirativnih i uspješnih Bosanaca/ki i Hercegovaca/ki sa grupama mladih ljudi kako bi razgovarali o svom iskustvu, idejama ili javnim pitanjima važnim za mlade.



## INFORMACIJE / DONATORI / POZIVI

### Javni poziv za obuku stručnih saradnika/ca za rad sa mladima

Radiš ili dugoročno volontiraš u omladinskoj organizaciji, omladinskom centru, omladinskom klubu ili u nekoj instituciji provodiš projekte sa i za mlade ljude? Smatraš se omladinskim radnikom/com ili nosiš tu titulu u svojoj organizaciji. Želiš upoznati kolege/ice koji rade isto? Imaš volju dijeliti svoje iskustvo i steći novo znanje i vještine o radu s mladima? Prijavi se na obuku za stručne saradnike/ce za rad s mladima!

#### Ko su stručni saradnici/ce za rad s mladima?



Stručni saradnici/ce za rad s mladima (poznatiji kao omladinski radnici/ce) predstavljaju osobe koje rade u omladinskim centrima, omladinskim klubovima, omladinskim organizacijama, organizacijama koje rade s mladima ili javnim ustanovama koje podržavaju razvoj mladih ljudi. Stručni saradnik/ca podržava profesionalni, lični i obrazovni razvoj mlade osobe. Radeći s mladima na različitim idejama i inicijativama, stručni saradnici/ce za rad s mladima zajedno s mladima rade i na razvoju zajednica u kojoj djeluju.

#### Šta je obuka stručnih saradnika/ca za rad s mladima?

Na inicijativu Instituta za razvoj mladih KULT 2014. g. zanimanje stručnog saradnika/ce za rad s mladima uvršteno je u klasifikaciju zanimanja Agencije za statistiku BiH.

Institut organizira obuku za stručne saradnike/ce za rad s mladima u trajanju od 20 dana (160 sati). Obukom podržavamo osobe koje rade s mladima i unaprjeđujemo njihove vještine i znanja za razvoj omladinskog sektora i omladinskog rada u Bosni i Hercegovini. Pored četiri modula obuke polaznici/e dobivaju konkretne praktične zadatke i rad u svojoj zajednici nakon svakog modula, te imaju završno testiranje, nakon čega stječu pravo na certifikat.

#### Ko se može prijaviti na obuku?

Na obuku se mogu prijaviti sve osobe nastanjene u Bosni i Hercegovini koje imaju završenu najmanje srednju školu, rade s mladima u omladinskim centrima, omladinskim klubovima, omladinskim organizacijama, organizacijama koje rade s mladima, nevladinim organizacijama, savjetovalištim i institucijama koje provode projekte za mlade. Svaka prijavljena osoba mora imati podršku jedne organizacije ili institucije za učešće, a koja se uklapa u najmanje jednu od navedenih kategorija. Za uspješno završenu obuku potrebno je učestvovati najmanje 80% vremena trajanja obuke, uraditi praktični rad i položiti završni test.

#### Kada se održava obuka po ovom javnom pozivu?

Prvi modul: 29.juna -1. jula 2019.

Drugi modul: 18. septembra - 21. septembra 2019.

Treći modul: 16. oktobra – 19. oktobra 2019.

Četvrti modul: 13. novembra – 16. novembra 2019.

Svi moduli traju po četiri dana. U gore navedene termine nije uračunato vrijeme putovanja polaznika/ca obuke.

Institut zadržava pravo izmijene termina uz pravovremeno informiranje polaznika/ca. Testiranje i dodjela certifikata će biti održana u prvoj polovini decembra 2019.

### Šta očekivati od obuke?

Obuka za stručne saradnike/ce za rad s mladima sastoji se od četiri modula obuke, praktičnog rada i testiranja.

Tematske oblasti su: rad s mladima, komunikacija s mladima, socijalne kompetencije i organizacijske vještine u radu s mladima.

Interaktivni rad, metode neformalnog obrazovanja, iskustveno učenje i razmjena iskustva će biti sastavi dio obuke. Obuka pored radnog dijela sadrži i niz sadržaja kroz koji će polaznici/e imati priliku razmjenjivati svoje profesionalna i životna iskustva i družiti se.

### Kako se prijaviti?

Aplikacije se primaju putem online prijave <http://mladi.org/myURL/ssrm19>.

**Rok za prijavu je 20. maj 2019.g. do 17.00 sati.**

Prijave koje pristignu poslije ovog roka neće biti razmatrane. Imena izabranih polaznika/ca obuke bit će poznata početkom juna 2019.g. na web-stranici Instituta. Osobe koje budu odabrane za obuku bit će o tome obaviještene na email adresu koju su navele u prijavnim obrascu.

### Ko snosi troškove obuke?

Institut za razvoj mladih KULT snosi troškove smještaja, hrane i prijevoza za vrijeme trajanja obuke.

Za organizaciju testiranja i certificiranja potrebno je prije početka 1. modula platiti participaciju u iznosu od 50,00 KM. Participaciju može platiti sam polaznik/ca ili organizacija/institucija iz koje dolazi. Za participaciju organizator izdaje odgovarajući račun. Instrukcije za plaćanje na žiroračun bit će dostavljene polaznicima/ama na vrijeme.

Za više informacija možete nas kontaktirati na [katarina.vuckovic@kultbih.org](mailto:katarina.vuckovic@kultbih.org) ili telefonom na 033 778 765. Više informacija o Institutu mogu se naći na [www.mladi.org](http://www.mladi.org).

Pitanja zaprimamo najkasnije do 15.5.2019. g.

**NAPOMENA:** Svaki pokušaj kontaktiranja bilo kojeg uposlenika/ca Instituta vezano za dobivanje dodatnih informacija mimo navedene email adrese i svaki pokušaj podmičivanja bilo kojeg zaposlenika/ce vodi do diskvalifikacije kandidata/kinje.

## Mijenjanje Priče: Mladi filmski stvaraoci i aktivisti u BiH

Ako ste mladi filmski stvaralac, star između 18 i 26 godina, živite u Bosni i smatrate se aktivistom, ili želite da budete, pročitajte dalje.

Mijenjanje Priče je četverogodišnji međunarodni, multidisciplinarni projekt koji podržava izgradnju inkluzivnih civilnih društava sa, i za, mlade ljude u 5 postkonfliktnih zemalja. To je zajednički projekat između univerziteta, nevladinih organizacija, umjetnika, lokalnih organizacija civilnog društva i mladih širom svijeta. Uključene zemlje su Južna Afrika, Ruanda, Kolumbija, Kambodža i Kosovo i kroz ovaj konkretni projekat, Bosna i Hercegovina.

Opera Circus saraduje sa mladima u BiH od 2004. godine, posebno u Srebrenici.

Tina Ellen Lee, njihov umetnički direktor, pozvana je kao rezidentna umjetnica da učestvuje u prvoj seriji radionica u Prištini u septembru 2018. godine. Uslijedila je uspješna ponuda za razvoj praktičnog dijela projekta za istraživanje umjetnosti mladih u Bosni i Hercegovini. To uključuje rad sa grupom mladih filmskih stvaralaca iz cijele BiH uz velikodušnu podršku Filmske akademije sarajevske Škole za nauku i tehnologiju preko dr. Jasmina Hasića, uz dr. Tiffany Fairey i dr. Henry Redwood iz Kings College, London.

Robert Golden će voditi praktičnu obuku za razumijevanje pričanja priča u filmu, kao i doprinijeti procesu učenja oko aktivizma. Robert nije samo međunarodni fotograf i filmski stvaralac, već je cijeli svoj život radio protiv rasizma i nepravde. Robert je radio s Circus Operom u BiH od 2004. godine. Neke od njegovih fotografija o važnom doprinosu Generacije Windrush Velikoj Britaniji nakon Drugog svjetskog rata bit će vidljive u Galeriji crnih kulturnih arhiva u Brixtonu u Londonu od 21. maja 2019. godine. Neke od Robertovih dokumentarnih filmova distribuira Al Jazeera, kao što su serija Balkan Blues i Savouring Europe.

Mladi lideri razvijaju komunikacijsku strategiju (Francesco Pipparelli), web dizajn i sadržaj društvenih medija (Marko Stanković i Irena Maria Ganesco).

Melisa Mehmedović je voditeljica projekta, a Lamia Šabić će asistirati Robertu kao mentor tokom cijelog procesa.

Dr Jasmin Hasić vodi i nevladinu organizaciju Humanity in Action koja je međunarodna obrazovna organizacija sa sjedištem u Sarajevu. HiA ima za cilj da obrazuje, inspiriše i poveže globalnu mrežu studenata, mladih profesionalaca i etabliranih lidera posvećenih promovisanju ljudskih prava, različitosti i aktivnog građanstva - u svojim zajednicama i širom svijeta.

Prve radionice će se održati od 2. do 6. jula 2019. godine, nakon čega će uslijediti dva mjeseca stvaranja kratkih filmova, uz mentorstvo.

Rok za prijave je 10. maj, 17.00 sati.

To je prvenstveno projekt o razvijanju aktivizma kroz pričanje priča i snimanje filmova i učenje kako da se čuju glasovi mladih.

Ovdje je link za aplikaciju:

<http://thecompletefreedomoftruth.com/changing-the-story-bih-prijava>

Više informacija na [changingthestoryBIH@gmail.com](mailto:changingthestoryBIH@gmail.com)

## Prijavite se za start-up i preduzetničko takmičenje

**Landbell grupa raspisuje poziv za prijave za startup i preduzetničko takmičenje pod nazivom "Zelena aleja", koje će se održati u Berlinu. Pobjednik ovog takmičenja osvojiće 25.000 eura.**

### **OBLAST:**

Startup, preduzetništvo, ekonomija

### **OPIS**

"Zelena Aleja" daje nagrade za startup i preduzetnike u ekonomiji. Njihova misija je da linearnu ekonomiju pretvore u kružnu i da transformišu industriju otpada i recikliranja kakvu je danas poznajemo. Ovu godišnju evropsku nagradu kreirala je 2014. Landbell grupa, vodeći snabdjevač globalnih ekoloških usluga zajedno sa njemačkim pionikom Seedmatch-om. Vremenom se priključilo još partnera – Benthall zeleni poduhvati, britanski program za ubrzanje startapa koristeći tehnologiju i R2Pi, projekat EU Horizont 2020 za poslovne modele kružne ekonomije. Pobjednik ovog takmičenja će dobiti 25.000 eura u gotovini.

### **USLOVI**

Za prijavu su pogodni startupovci koji se nalaze u Evropi, koji žele da se bore sa izazovima globalnog otpada koristeći:

- rješenja digitalne kružne ekonomije.
- reciklažna rješenja.

– ideje za sprječavanje otpada.

### NAČIN PRIJAVE

Kako biste se prijavili ispunite onlajn aplikacionu formu na <https://green-alley-award.com/apply/>

### ROK ZA PRIJAVU:

25. jun 2019.

## Javni konkurs – Igre na sreću 2018.

Federalno ministarstvo razvoja, poduzetništva i obrta objavljuje Javni natječaj za financiranje programa i projekata iz dijela prihoda ostvarenih po osnovu naknada za priređivanje igara na sreću

Predmet natječaja je prikupljanje zahtjeva za dodjeljivanje sredstava iz dijela prihoda ostvarenih po osnovu naknada za priređivanje igara na sreću iz 2018. godine u svrhu financiranja/sufinanciranja programa i projekata koji se odnose na:

- Promociju tehničke kulture i
- Udruženja koja se bave inovacijama za nagradni fond za nagrađivanje inovatora za inovacije od međunarodnog značaja.

Potrebnu dokumentaciju, kao i format izvješća o utrošenim sredstvima, možete preuzeti na sljedećim linkovima:

- [Javni natječaj igre na sreću sredstva iz 2018](#)
- [Smjernice-za-uključivanje-u-Projekt](#)
- [Obrazac Zahtjeva – inovacije](#)
- [Obrazac Zahtjeva – tehnička kultura](#)
- [Obrazac izvještaja – inovatori](#)
- [Obrazac izvještaja – tehnička kultura](#)



### Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*  
**Omladinski resursni centar Tuzla**  
**Hadži Bakirbega Tuzlića 1**  
**75000 Tuzla**  
**tel/fax: 035 258 077**  
**e-mail: [orcuzla@bih.net.ba](mailto:orcuzla@bih.net.ba)**  
**[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje*  
**Omladinski resursni centar -**  
**ORC Tuzla**

*Prevod Biltena na engleski: Emir Karamujić*

*WEB stranica Mreže:*  
**[www.omladina-bih.net](http://www.omladina-bih.net)**

*Mejling lista Mreže:*  
**[posta@omladina-bih.net](mailto:posta@omladina-bih.net)**

*Webmaster:*  
**[emir.delalic@gmail.com](mailto:emir.delalic@gmail.com)**